

TUTÚ NÍ CADÚHA TÉ PÄBLÚ QUIHIⁿ NDAHA ÑÁYIU DISTRITÚ GÁLACIÁ

*Té Päblú cádüha-dé tutú quíhíⁿ ndaha nchaa ñáyi
sàndáá iní ñáhá xii Xítohó Jesucrístú ndécú dístritú
Gàlaciá*

¹ Te yúhú té Päblú ní tendaha ñàha Xítohó Jesu-
crístú, ndíhi Dútú Ndiöxí véxi-í càháⁿ-í tnúhu-gá. Te
diu Yá Ndiöxí ní dándótó-gă Xítohó Jesucrístú Yáá
ní xíhí ní cùu. Te càchí tnúhu-í xii-ndo sã ñà díú
ñáyi ñuyíú-a ní tëndaha ñàha xii-í véxi-í, te ni Yá
Ndiöxí te ni Xítohó Jesucrístú ñá túú ní xàhaⁿ-gã
xii ñⁿ ñáyi quixí-yu cachí tnúhu-yu nàcuáa cada-í.

² Te yúhú té Päblú cádüha-í tutú-a ndíhi nchaa
dava-gá ñáyi ndècu ichi Yá Ndiöxí ndécú ndíhi-í
iha cuendá daquixi-í ndaha nchòhó ñáyi sàndáá
iní ñáhá xii Xítohó Jesucrístú ndécú dístritú Gàlaciá.

³ Te xicáⁿ táhù-í núú Dútú Ndiöxí, ndíhi núú Xítohó
Jesu-crístú sá ïo na chindee chitúu ñàha-gá xii-ndo,
te ducaⁿ ndi nduú-gá ná cádá te ío váha cuu iní-ndó
cùndecu-ndo.

⁴ Te Xítohó Jesucrístú ní xíhí-gá
sá cuendá nchaa cuéchi nchoo cuè ñáyi ndècu
ñuyíú-a. Te ducaⁿ nĩ quide-gá, chi cuíní-gá sá vã
cùndecu-o ichi cuehé ichi duha. Te ducaⁿ nĩ cuu,
chi Dútú Ndiöxí ducaⁿ nĩ cuíní-gá cunduu. ⁵ Te
ío chí ná ndàcáⁿ táhù-ó núú Yá Ndiöxí cuendá sá
ïo càhnu cuu-gá, te diu-ni ducaⁿ càda-o ni caa ni
quíhíⁿ! Te ducaⁿ na cùnduu.

Mee-ni tnũhu Xítoho Jesucrístú cúú-xí tnũhu sá cãháⁿ nãcuáa naníhí tàhú-ó

⁶ Te ío cũnúhu-í cúú chi ío ndĩhi ní dãná-ndó ìchi Yá Ndiõxí. Te Yaa-áⁿ nĩ cãháⁿ ñáhá-gã xii-ndo, chi Xítoho Jesucrístú ío ní cundàhú iní ñáhá-gã ní quide váha ñaha-gã xii-ndo, te vitna dàcuaha tucu-ndo ìngá tnúhu, te cãchí-ndó sã xiãⁿ dàcãcu nihnu ñaha-xi xii-ndo núú ùhú núú ndàhú. ⁷ Dico ñáhá, chi ñá túú-gã tnúhu sá dácãcu nihnu ñaha xii-o núú ùhú núú ndàhú. Te dìcò-ni sá ío ñáyiu véxi dàticá nuu ñahá-yu xii-ndo dانهé ñáhã-yu tnúhu sá dácũta nihnu ñaha xii-ndo, chi tnúhu-áⁿ ñà túú cùu-xi tnúhu Xítoho Jesucrístú. ⁸ Te yúhú cãháⁿ-í tnúhu Xítoho Jesucrístú, dico núu ío ñáyiu véxi dانهé ñáhá xii-ndo ìngá tnúhu sá ñà túú ní dانهé ñáhà-í xii-ndo, te nchòhó cachí-ndó sã ñáyiu-áⁿ nacháhu-yu núú Yã Ndiõxí sá dúcãⁿ quidé-yu. Te cuẽi yúhú, te núu na dàma-í tnúhu danèhé ñáhà-í xii-ndo, te diu-ni ducaⁿ cãháⁿ-ndó sã náchãhu-í núú-gã te núu ducaⁿ na càda-í. Àdi te núu ìⁿ espíritú xínú cuèchi núú-gã véxi-xi cãháⁿ-xi ìngá tnúhu sá ñà túú ní dانهé ñáhà-í xii-ndo nãcuáa naníhí tàhú-ndó ñá, te diu-ni ducaⁿ cãháⁿ-ndó sã náchãhu-xi núú Yã Ndiõxí te núu ducaⁿ na càda-xi. ⁹ Te diu-ni duha sa ní dانهé ñáhà-í xii-ndo sã núu véxi ñáyiu dانهé ñáhá ìngá tnúhu sá ñà túú ní dانهé ñáhà-í xii-ndo nãcuáa naníhí tàhú-ndó ñá, te cachí-ndó sã ñáyiu-áⁿ nacháhu-yu núú Yã Ndiõxí sá dúcãⁿ quidé-yu, duha ní cachí-í xii-ndo.

¹⁰ Te duha ndùu tnúhu cãháⁿ-í chi nchòhó sa xìní-ndó sã yúhú cuìní-í sá Yã Ndiõxí cãháⁿ-gã sá quidé vãha-í ndécù-í, te ñá díú sã ñáyiu ñuyíú-a cachí-yu sá quidé vãha-í, àdi sá ío cùdĩ iní-yu nchaa

nàcuáa quide-í ndécù-í. Te núu na càni iní-í cudù-í núu ñáyi ñuyíú-a, te ñá túu cùu-í té xinu cuechi núu Xítoho Jesucristú te núu ducaⁿ na càda-í.

Nàcuáa ní cuu ní ngüita té Păblú càháⁿ-dé tnúhu Yá Ndiöxí

¹¹⁻¹² Te nchòhó ñáyi ndècu ndihí-í ichi Xítoho Jesucristú cächí tnúhu-í xii-ndo sá tnúhu sá dánèhé ñáhà-í xii-ndo nàcuáa naníhí tǎhú-ndó cùu-xi tnúhu sá ñí cachí tnúhu mee Xítoho Jesucristú xii-í, te ñá díú ñáyi ñuyíú-a ní càhu iní-yu tnúhu-án, àdi danèhé ñáhǎ-yu xii-í, chi mee Xítoho Jesucristú ní dánèhé ñáhǎ-gǎ.

¹³ Te nchòhó sa ñihí-ndó tnúhu nàcuáa ní xóo cada-í cùtnàhá nchìcúⁿ nihnu-í nchaa nàcuáa dàcuaha ñáyi cùu ndi mee-í ñáyi israhél ní cùu. Te dàvá-án ò ní xóo cuu úhú iní-í nchaa ñáyi ndècu ichi Yá Ndiöxí, te nándi sá ñí xóo cada-í-yu, te ní cuiní-í danàa-í-yu ní cùu. ¹⁴ Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyi cùu ndi mee-í dàcúúxí ñáyi ñí-ni cuìà-í ndihí-yu ní cùu, te ío-gá ní xóo cuiní-í cada ndáá-í canchicúⁿ nihnu-í nchaa nàcuáa ní dánèhé ñáhǎ cuè ñaní tnáhà-í ní xíndecu ndéé sanaha ní cùu. ¹⁵ Te ndéé cùtnàhá vátá cǎcú-gǎ-í Yá Ndiöxí sa nèhe váha ñaha-gǎ xii-í cuendá sá càháⁿ-í tnúhu-gǎ, núu xǎⁿ ní càháⁿ ñáhǎ-gǎ xii-í quidè-í chiuⁿ-gǎ vitna, te sá dúcǎⁿ ñí quide-gǎ te ío váha ní quide ñaha-gǎ xii-í. ¹⁶ Te òré ní càháⁿ ñáhǎ Yá Ndiöxí xii-í te ní cachí tnúhu-gǎ cuendá Déhe-gǎ Xítoho Jesucristú. Te ducaⁿ ñí quide Yá Ndiöxí cuendá sá cuiní-gǎ sá cǔñaha-í xii ñáyi ñá túu cùu ñáyi israhél cuendá Yaá cúú Déhe-gǎ. Te cùtnàhá ní càháⁿ ñáhǎ Yá Ndiöxí xii-í, te vá yǒo ñí dǐi núú-xi ní ndùcu

tnúhu-í nàcuáa cada-í. ¹⁷ Te ni ñà túú ní sáháⁿ-í ñuú Jerusálén nducu tnúhu-í núú cuè téé díhna nuu ní tendaha Xítoho Jesucristú cáháⁿ tnúhu-gá ñuú nása cada-í, chi ndíhi-ni ní sáháⁿ-í distrítú Àrabiá ní xíndecu tnaa-í te dàtnùní cuánuhú tucu-í ñuú Dàmascú.

¹⁸ Te núú ùní cuíá sá ní cáháⁿ ñáhá Yá Ndiõxí xii-í, te ní sáháⁿ tucu-í ñuú Jerusálén ní cáháⁿ ndíhi-í té Pèlú, te ní xíndecu-í ndíhi-dé sáhúⁿ nduu. ¹⁹ Te tnàhá té Jàcobó ñaní Xítoho Jesucristú ní cáháⁿ ndíhi-í. Te ñà túú ní xìní-í dava-gá cue téé ní tendaha Xítoho Jesucristú cáháⁿ tnúhu-gá. ²⁰ Te Yá Ndiõxí ndéhé ndíi ndehe caxi-gá sá ncháá tnúhu tèe-í núú tùtú-a sá cúú-xí-ndó cùu-xi ñⁿ sá ndàá.

²¹ Te sáta ní sáháⁿ-í ñuú Jerusálén, te dàtnùní ní sáháⁿ-í distrítú Sìriá, ndíhi distrítú Cìliciá. ²² Te nchaa ñáyíu xíndecu ichi Xítoho Jesucristú ndécú distrítú Júdeá ñà túú xìní ñáhã-yu xii-í ní cùu. ²³ Dico ní xóo níhí-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyíu ndècu ichi Xítoho Jesucristú cáháⁿ-dé tnúhu-gá núú ñáyíu cuèndá quíndáá iní ñáhã-yu xii-gá, te díu-dé nándi sá quidé ñàha-dé, te cuíní-dé danàa ñàha-dé cuèndá sá vã cóo-gã ñáyíu quíndáá iní ñáhá xii-gá ní cùu”, duha ní cachí-yu cuèndá-í. ²⁴ Te ní ngüíta-yu ní cachí-yu sá ïo càhnu cuu Yá Ndiõxí cuèndá sá ñà túú-gã quidé-í dàtná ní xóo cada-í.

2

Té Păblú ní níhí tnáhá-dě ndíhi dava-gá cue téé cáháⁿ tnúhu Yá Ndiõxí

¹ Te ní nútnahá úxícúmí cuíá sǎ nǐ sáháⁿ-í ñuú Jerusàlén ní cáháⁿ ndihi-í té Pèlú, te dàtnùní ndécà-í té Bèé ní sáháⁿ, te tnàhá té Tìtú ní sáháⁿ ndihi-ndí-dé. ² Te ní sáháⁿ-í chi mee Yǎ Ndiǒxí ní cachí-gá sá quihíⁿ-í. Te yàcáⁿ ní tacá mee-ni cuè té cùnuu. Te ní xáhaⁿ-í xii-güedé nàcuáa ndùu tnúhu dànehé-í ñáyiú ñá túú cùu ñáyiú isràél cuendá naníhí tàhú-yu. Te ducaⁿ nǐ quide-í cuendá cuíní-í quini-güedé nàcuáa ndùu chiuⁿ quide-í, chi nacuáháⁿ cachí-güedé sá ñà túú nàndíhi-xi. ³ Te té Tìtú té ndècu ndihi-í chi ñá díú tée isràél cúú-dé, dico ñá túú ní quide yica-güedé cuáha-güedé sèñá ñi-dé. ⁴ Te ñáyiú cǎchí sá ndécú ìchi Xítóhó Jesucristú te ñà ndáá sá ndécú-yu ichi-gá, ñáyiú-áⁿ nǐ chitnahá ñáhǎ-yu xii-ndí cuendá cuíní-yu quini-yu nása quide-ndí ndécú-ndí ichi Xítóhó Jesucristú. Te ducaⁿ nǐ quidé-yu cuendá sá nchúhú sa ní cácu nihnu-ndí ñá túú-gǎ quidé-ndí nchaa nàcuáa ní cáháⁿ ndí Moisés. Te cuíní-yu sá núcuíta saa tùcu-ndí cada-ndí nchaa nàcuáa ní cáháⁿ ndí núcúndecu-ndí dàtná ní xíndecu-ndí cútnàhá vátá cácu nihnu-gá-ndí núú tnúhu-áⁿ ni cùu. ⁵ Te nchúhú ñá túú tnàhí ni dàña-ndí méé-ndí dandàhú ñáhǎ-yu xii-ndí. Te ducaⁿ nǐ quide-ndí, chi cuíní-ndí sá ñà túú nǎgá tnúhu dácánuu ndihi tnúhu sá càháⁿ nàcuáa naníhí tàhú-ó ndècu ndihi-ndo.

⁶ Te ni ñⁿ tnúhu sá vátá quini-gá-í ñá túú ní cǎchí tnúhu cue té cùnuu núú ñáyiú cada-í. Dico yúhú chi ñá túú ní quide cuendá-í nùu cùnuu-güedé àdi ñá túú cùnuu-güedé, chi núú Yǎ Ndiǒxí ñⁿ-ni cùu-o nchaa-o. ⁷ Te ní cutnùní iní-güedé sá Yǎ Ndiǒxí ní cachí-gá xii-í sá càháⁿ-í tnúhu-gá núú ñáyiú ñá

túú cùu ñáyiú isràél dàtná ní quide-gá té Pèlú ní xáhaⁿ-gã càháⁿ-dé tnúhu-gá núú ñáyiú isràél. ⁸ Te ducaⁿ ñí cutnùní iní-güedé, chi ñiú-ní Yá Ndiöxí Yáá chindèe ñaha xii té Pèlú càháⁿ-dé tnúhu-gá núú ñáyiú isràél, ñiú-ní Yáá-áⁿ chindèe ñaha-gá xii-í càháⁿ-í tnúhu-gá núú ñáyiú ñá túú cùu ñáyiú isràél.

⁹ Te té Jàcobó, ndihí té Pèlú, ndihí té Juàá, cue tée ío cùnuu-gá ní cutnùní iní-güedé sá Yá Ndiöxí ío chindèe ñaha-gá xii-í quidè-í chiúⁿ-gá. Te ío váha ní cáháⁿ ndihí ñaha-güedé xii-í, ndihí té Bèé, te ní cuu ñíⁿnuu-ndí sá nchúhú quíhíⁿ-ndí cáháⁿ-ndí tnúhu Yá Ndiöxí núú ncháa ñáyiú ñá túú cùu ñáyiú isràél, te mee-güedé cáháⁿ-güedé tnúhu-gá núú ñáyiú isràél.

¹⁰ Te ñíⁿ-ní tnúhu ní cáháⁿ-güedé dóho-ndí te ní cachí-güedé xii-ndí sá chindèe-ndí cue ñáyiú ndàhú, te sa ducaⁿ tnàhí sàni iní-ndí cada-ndí.

Té Păblú càháⁿ-dé dóho té Pèlú ñuú Antiòquiá

¹¹ Te cútnàhá ní sáháⁿ té Pèlú ñuú Antiòquiá yàcáⁿ ní cáháⁿ-í dóho-dé, chi quide-dé ñíⁿ sá ñà túú tàú-dé cada-dé ní cùu. ¹² Te quide váha-dé ní cùu chi xèxi-dé ndihí ñáyiú ñá túú cùu ñáyiú isràél, dico òré ní sáá ñíⁿ úú ñáyiú cùndihí té Jàcobó, te òré-áⁿ ñà túú-gã ní cuíní-dé caxi-dé ndihí ñáyiú-áⁿ. Te ducaⁿ ñí quide-dé chi ní yùhú-dé cue ñáyiú nchícúⁿ nihnu quide ncháa nacuáa ní cáháⁿ ndí Moisés sá vã càháⁿ váha-yu cuendá-dé. ¹³ Te tnàhá dava-gá ñáyiú isràél xíndecu ichi Yá Ndiöxí ñá túú quide váha-yu, chi quidé-yu dàtná quidé tẽ Pèlú ní cùu, te ndéé tnàhá té Bèé ní ngúíta-dé ducaⁿ quide-dé ní cùu. ¹⁴ Te òré ní xiní-í sá ñà túú quide-güedé ndihí-yu nàcuáa càháⁿ tnúhu Yá Ndiöxí, te núú

nchàa ñáyiú ndècu ichi Yá Ndiöxí ní xáhaⁿ-í xii té Pèlú: “Yòhó cúú-n tée isràél, te ñá túú quide-n nchaa nacuáa quide ñáyiú isràél, chi quide-ni-n datná quidé nchàa ñáyiú ñá túú cùu ñáyiú isràél. Te núu ducaⁿ quide-n, ¿te ná cuendá dánèhé-n ñáyiú ñá túú cùu ñáyiú isràél sá cáda-yu nchaa nacuáa quide ñáyiú isràél?”, duha ní xáhaⁿ-í xii té Pèlú.

Iⁿ-ni nàníhí tàhú-ó ndíhi ñáyiú isràél núu na quèndáá iní-ó Xítohó Jesucrístú ndíhi-yu

¹⁵ Te yúhú ndíhi té Pèlú cúú-ndí ñaní tnáhá ñáyiú isràél, te ñá túú ndècu-ndí ichi cuèhé ichi duha datná ndécú nchàa ñáyiú ñá túú cùu ñáyiú isràél.

¹⁶ Te xíní-ó sá vǎ cùndècu-gǎ cuéchi-o núú Yǎ Ndiöxí te núu na quèndáá iní-ó Xítohó Jesucrístú, te ñá díú sǎ cáncíhíⁿ nihnu-o cáda-o nchaa nacuáa ní cáhǎⁿ ndíi Moisés. Te tnáhá dava nchúhú ñáyiú isràél sàndáá iní-ndí Xítohó Jesucrístú, te xiǎⁿ cútnùní iní-ndí sǎ ñà túú-gǎ cuéchi-ndí ndécú núú-gǎ, dico ñá díú sǎ ní cáncíhíⁿ nihnu-ndí ní quide-ndí nacuáa ní cáhǎⁿ ndíi Moisés, chi cuendá sǎ sàndáá iní-ndí Xítohó Jesucrístú. Te vǎ yǎo ñⁿ cachí-ó sǎ ñà túú ndècu cuéchi-xi núú Yǎ Ndiöxí cuendá sǎ nchíⁿ nihnú-yu nchaa nacuáa ní cáhǎⁿ ndíi Moisés.

¹⁷ Te núu cuíní-ó sǎ vǎ cùndècu cuéchi-o núú Yǎ Ndiöxí cuendá sǎ sàndáá iní-ó Xítohó Jesucrístú, te xiǎⁿ cútnùní iní-ó sǎ ñà túú quide váha-o. ¿Te vǎ cúú tnáhí caní iní-ó sǎ Xítohó Jesucrístú dánèhé ñáhǎ-gǎ xii-o sǎ vǎ cáda váha-o cùndecu-o! ¹⁸ Te yúhú càchí-í sǎ vǎ cáncíhíⁿ nihnu-gǎ-ó nchaa nacuáa ní cáhǎⁿ ndíi Moisés, dico núu vitna càchí-í sǎ xíní ñùhu-xi cada-o nchaa nacuáa ní cáhǎⁿ

ndíi ña, te ñá túú quide váha-í núú Yă Ndiõxí te núu ducaⁿ na càda-í. ¹⁹ Te yúhú duuⁿ duuⁿ ní cutnùní iní-í sá vă ndácù-í cada-í nchaa nàcuáa ní cáháⁿ ndíi Moisés núu xíáⁿ ní dǎñà-í ñá túú-gǎ nchìcúⁿ nihnu-í nchaa nàcuáa ní cáháⁿ ndíi cuendá sá cuìní-í cundecu-í sá cúú-xí Yă Ndiõxí. ²⁰ Te Xítóhó Jesucrìstú ní xíhí-gǎ cuendá-í, dico dàtná tnúhu sá tnàhá-í ní xíhí ndìhi-gǎ, chi ñá cúú-gǎ cada-í nchaa nàcuáa sàni iní mèè-í, chi Xítóhó Jesucrìstú-ñǎ ndécú ndìhi ñaha-gǎ xii-í táxí tnùní ñáhá-gǎ. Te vitna ndècu-í ñuyíú-a, te ío sàndáá iní-í Xítóhó Jesucrìstú Déhe Yă Ndiõxí, te chindee ñaha-gǎ xii-í. Te ñu-ni Xítóhó Jesucrìstú ío cùu iní ñáhá-gǎ xii-í núu ní xíhí-gǎ núú cùrúxí sá cuendá-í. ²¹ Te vitna ñá túú dàquee tíhù-í sá vǎha ní quide ñaha Yă Ndiõxí xii-í, chi núu ni ndàcu-o vǎ cùndècu cuéchi-o núú Yă Ndiõxí cuendá sá nchìcúⁿ nihnu-o quide-o nchaa nàcuáa ní cáháⁿ ndíi Moisés ní cùu ña, te àúⁿ ñǎ cuu ní xíhí Xítóhó Jesucrìstú ní cùu te núu ducaⁿ.

3

Vá dǎñǎ ndèé-ó quèndáá iní-ó tnúhu Xítóhó Jesucrìstú

¹ Te nchòhó ñáyíu distritú Gálaciá, ñáyíu sa xíndecu ichi Xítóhó Jesucrìstú, ¿ná cuendá ío ñíí iní-ndó ñǎ cuìní-ndó tnèi-ndo nchaa tnúhu càháⁿ-gǎ?, ¿te yoo ní dádǎhu ndodo iní ñáhá xii-ndo núu ducaⁿ quide-ndo? Te nàha-ndo sá ío váha ní dǎnèhé ñáhá-ndí xii-ndo nàcuáa ní cuu ní xíhí Xítóhó Jesucrìstú. ² Te vitna cáháⁿ-ndó núu sá nchìcúⁿ nihnu-ndo nchaa nàcuáa ní cáháⁿ ndíi Moisés ní níhí-ndó Espíritú Yă Ndiõxí ndécú ndìhi-ndo, àdi sá ni sàndáá iní-ndó tnúhu

Xítohó Jesucrístú sá nǐ dánèhé ñáhá-ndĩ xii-ndo nǐ níhí-ndó Espíritú-gá ndécú ndĩhi-ndo. ³ Te nchòhó ío nǐ dĩquí-ndó chi Espíritú Yǎ Ndiǒxí tá quide váha ñaha-xi xii-ndo cuáháⁿ ní cùu. ¿Te náa vitna mee-nǎ-ndó cuení-ndó càda-ndo nacuaa ta quide ñaha Espíritú-gá cuáháⁿ xii-ndo ní cùu-áⁿ? ⁴ Te sàni ìⁿ sani úú iní-í cuèndá-ndó sǎ àúⁿ nǎ cuu nándi yáha-ndo ndècu-ndo ichi Yá Ndiǒxí. ⁵ Te xini-ndó sǎ Yá Ndiǒxí ní taxi-gá Espíritú-gá ní ngúndecu ndĩhi-ndo, te ní quide-gá sǎ vǎ yǒo tnàhí ndàcu cada núú-ndó nǐ xini-ndó. Te ducaⁿ nǐ quide-gá, chi ní sándáá iní-ndó-gǎ, dico ñá díú cuèndá nchaa nàcuáa ní cachí ndíi Moisés cada ñáyiú ducaⁿ nǐ quide-gá.

⁶ Te ndíi Àbrahám ducaⁿ ío ní sándáá iní ndíi Yá Ndiǒxí, núu xǎⁿ ní cachí-gá sǎ nǐ cudíu ndíi núú-gǎ sǎ dúcáⁿ nǐ quide ndíi. ⁷ Te càchí tnúhu ndáá-í xii-ndo sǎ ncháá ñáyiú sàndáá iní ñáhá xii Yá Ndiǒxí dàtná ní sándáá iní ñáhá ndíi Àbrahám xii-gá, ñáyiú-áⁿ ìⁿ-ní cùú-yu ndĩhi ndíi núú-gǎ. ⁸ Te núú tùtú Yá Ndiǒxí ní ngódó tnùní tnúhu váha, tnúhu sǎ nǐ xáhaⁿ Yá Ndiǒxí xii ndíi Àbrahám, te duha ní xáhaⁿ-gǎ xii ndíi: “Nchaa ñáyiú nihíi ñuyíú cada váha-í-yu sǎ cuèndá-n”, duha ní xáhaⁿ-gǎ xii ndíi. Te sǎ dúcáⁿ nǐ ngódó tnùní núú tùtú Yá Ndiǒxí ndéé dàvá-áⁿ, te xǎⁿ cútnùní sǎ sàá nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gǎ te núu na quèndáá iní ñáhǎ-yu xii-gá. ⁹ Te xǎⁿ núu nchaa ñáyiú sàndáá iní ñáhá xii Yá Ndiǒxí cada váha ñaha-gǎ xii-yu dàtná ní quide váha-gá ndíi Àbrahám, chi ndíi-áⁿ ducaⁿ nǐ sándáá iní ñáhá ndíi xii-gá.

10 Te nchaa ñáyiú cuìní cada nchaa nàcuáa ní cáháⁿ ndíi Moisés cuèndá sá cuìní-yu sá vǎ cùndècu-gá cuéchi-yu núú Yǎ Ndiǒxí, ñáyiú-áⁿ daña nihnu ñaha-gá xii-yu, chi vǎ ndácũ-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tùtú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te daña nihnu ñaha-gá xii-yu.

11 Te núu na càncicúⁿ nihnu-ni-o càda-o nacuáa ní cáháⁿ ndíi Moisés, te ñá túú vèdana chindee ñaha-xi xii-o nacuáa vǎ cùndècu-gá cuéchi-o núú Yǎ Ndiǒxí. Te ndáá chi núú tùtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gǎ cuéchi-xi ndècu ío váha ndècú-yu núú-gǎ. 12 Te núu dìcò ìò ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xini ñuhu-xi quindáá iní-yu tnúhu Xítóhó Jesucristú, chi núú tùtú Yǎ Ndiǒxí càchí-xi sá núu dìcò ìò ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yǎ Ndiǒxí.

13 Te tnúhu ní chídó tnùní ndíi Moisés càchí-xi sá ìo ndècu cuéchi-o núú Yǎ Ndiǒxí cuèndá sá ñǎ ndácú-ó càda-o nchaa nacuáa ní cáháⁿ ndíi, te cuèndá xǎⁿ tá dàña nihnu ñaha-gá xii-o cuǎháⁿ. Dico Xítóhó Jesucristú ní xido-gá nchaa cuéchi-o cuèndá sá vǎ dáña nihnu ñaha-gá Yǎ Ndiǒxí xii-o. Te càchí-xi núú tùtú Yǎ Ndiǒxí: “Ìⁿ téé na càta caa-güedé ìⁿ yutnu, te téé-áⁿ cúú-dě téé dàña nihnu ñaha Yǎ Ndiǒxí”, duha càchí-xi núú tùtú-gá. 14 Te ducaⁿ ñí yáha Xítóhó Jesucristú, chi cuìní Yǎ Ndiǒxí sá ndùu táhú nchaa ñáyiú ñá túú cùu ñáyiú isràél cundecu váha-yu dàtná ní nduu táhú ndíi Àbrahám ndécú váha ndíi. Te ducaⁿ ñí yáha-gá

cuendá nchaa nchoo ñáyi ndècu ndihi-í ichi Yá Ndiöxí na cächí tnúhu-í xii-ndo nàcuáa quide cue ñáyi ñuyíú-a cuendá tecú tnùní-gá-ndó nàcuáa quide Yá Ndiöxí. Chi ñáyi-án òré cuìní-yu cadá-yu ñⁿ sá cadá-yu, te díhna-gá ndátnúhu-yu te òré cúú ñⁿnuú-yu, te sáha firmá-yu ñⁿ tutú te tutú-án vǎ yǎo ñⁿ ndacu cáháⁿ sá vǎ nándíhi-gá-xi, te ni vǎ yǎo-gá ndacu nágá tnúhu chido tnùní núú-xí. ¹⁶ Te ducaⁿ ñí quide Yá Ndiöxí ndihi ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-án cúú-xí cuendá méé ndíi ndihi cuendá ñⁿ ñaní tnáhá ndíi cundecu ñuyíú-a ndéé cuéé-gá. Te núú tütú-gá cächí-xi sá tnúhu-án cúú-xí cuendá ñⁿ-ni ñaní tnáhá ndíi te ñá díú cuendá nchaá-yu. Te ñaní tnáhá ndíi téé cùu cuendá tnúhu-án cúú Xítohó Jesucristú. ¹⁷ Te na cächí tnúhu-í xii-ndo sǎ Yá Ndiöxí ní quide ndáá duuⁿ-gá ndihi ndíi Àbrahám nàcuáa cada-gá. Te sa ní cuu cúmí ciendú ócó úxí cuíá sǎ dúcáⁿ ñí xáhaⁿ Yá Ndiöxí xii ndíi Àbrahám, te dǎtnùní ní xáhaⁿ-gǎ xii ndíi Moisés chido tnùní ndíi nàcuáa cada ñáyi, te nchaa tnúhu ní chídó tnùní ndíi Moisés ñá túú dàquee tíhú-xi tnúhu sá ñí xáhaⁿ Yá Ndiöxí xii ndíi Àbrahám nàcuáa cada-gá. ¹⁸ Te núu dìcó cuendá nchaa tnúhu sá ñí chídó tnùní ndíi Moisés ní nàníhí tǎhú-ó ñá, te ñá túú-gǎ xíní ñùhu-xi cada cuendá-ó tnúhu ní xáhaⁿ Yá Ndiöxí xii ndíi Àbrahám cada-gá ní cùu te núu ducaⁿ. Te ndíi-án ñí naníhí tǎhú ndíi chi ducaⁿ ñí cächí Yá Ndiöxí cada ñaha-gǎ xii ndíi.

19 Te nchaa tnúhu ní cáháⁿ ndíi Moisés ní ngódó núú-xí nchìcúⁿ nihnu ñáyiú cuèndá ducaⁿ cùtnuní iní-yu sá ndécú cuèchi-yu, te nchìcúⁿ nihnu-ní-yu ndée ní sáá nduu nĩ quexìo Yaá cúú ñàní tnáhá ndíi Àbrahám, chi Yaá-áⁿ ducaⁿ nĩ xáhaⁿ Yă Ndiôxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yă Ndiôxí ní tendaha-gă cue espíritú xínú cuèchi núú-gă ní sáháⁿ-xí ní xítnúhu ñaha-xí xii ndíi nàcuáa danèhé ndíi ñáyiú.

20 Te Yă Ndiôxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dīco cútnàhá ní cáháⁿ ndihi-gá ndíi Àbrahám chi núú méé núú ñíⁿ ndíi ndihi-gá ní xáhaⁿ-gă xii ndíi nàcuáa cada-gá.

Nàcuáa ndiú nchaa tnúhu ní chídó tnùní ndíi Moisés

21 Te nchaa nàcuáa ní chídó tnùní ndíi Moisés, ndihi nchaa nàcuáa ní xáhaⁿ Yă Ndiôxí xii ndíi Àbrahám cada-gă, ñá túú dàquee tíhú tnáhá-xí. Te núú dīcò nánihí tàhú ñáyiú nchìcúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gă cuèndá-ni sá nchìcúⁿ nihnú-yu nchaa nàcuáa ní cáháⁿ ndíi ni cùu.

22 Te núú tùtú Yă Ndiôxí cāchí-xi: “Nchaa nchòhó ñáyiú ndècu ñuyíú ndécú cuèchi-ndo”, duha cāchí-xi. Te ducaⁿ cāháⁿ-xí cuèndá quíndáá iní-ó Xítohó Jesucrístú, te naníhí tàhú-ó chi ducaⁿ nĩ cachí Yă Ndiôxí cada-gă.

23 Te cútnàhá vátá cùndècu ndihi-gá-ó tnúhu Xítohó Jesucrístú, te nchìcúⁿ nihnu-o nchàa nàcuáa ní cáháⁿ ndíi Moisés, te ní cutnùní iní-ó sǎ ïo ndècu cuèchi-o ni cùu. Te ducaⁿ-ni nchìcúⁿ nihnu-o ndée ní sáá nduu nĩ quexìo Xítohó Jesucrístú ñuyíú-a, te

ní sándáá iní-ó-gă. ²⁴ Te nchaa tnúhu sá nĩ chídó tnùnĩ ndĩ Moisés ní sanu ichi ñaha-xi xii-o nacuaa cada-o cùndecu-o, te ducaⁿ-ni sànu ichi ñaha-xi xii-o ndéé ní sáá nduu ní quexìo Xítóhó Jesucrìstú ñuyíú-a. Te ducaⁿ nĩ cuu cuèndá quíndáá iní-ó-gă, te vá cùndecu-gá cuéchi-o nũú Yă Ndiõxí. ²⁵ Te vitna ní ngùndecu ndihi-o tnũhu Xítóhó Jesucrìstú, te ñá túú-gă xíní ñũhu-xi canu ichi ñaha nchaa tnúhu ní chídó tnùnĩ ndĩ Moisés.

²⁶ Te vitna tnàhá nchaa nchòhó cúú-ndó dēhe Yă Ndiõxí, chi ní sándáá iní-ndó Xítóhó Jesucrìstú. ²⁷ Te nchòhó ní sandute-ndo dàtná càchí-gă, te ndècu-ndo ndihi-gă, te quìde-ndo nchaa nacuaa ní cáháⁿ-gă ndécú-ndó, te ío ndècu yĩñuhu-ndo núú Yă Ndiõxí dàtná ndécú yĩñuhu mee Xítóhó Jesucrìstú. ²⁸ Te vitna ìⁿ-ni cùu-o nchaa-o ndecu-o ndihi Xítóhó Jesucrìstú cuèi cùu-o ñáyiu isràél àdi ñá túú cùu-o, te cuèi cùu-o ñáyiu ñá túú tnàhí dàñá quee núú chíúⁿ pàtróóⁿ-xi àdi cuu-o ñáyiu dàñá quée núú chíúⁿ pàtróóⁿ-xi, te cuèi téé te cuèi ñadìhí ìⁿ-ni cùu-o nchaa-o ndecu-o ndihi Xítóhó Jesucrìstú. ²⁹ Te nchòhó ndécú ndihi-ndo Xítóhó Jesucrìstú, te cùu-ndo datná cue ñaní tnàhá ndii Àbráhám, chi ní nduu táhú-ndó cùndecu váha-ndo nũú Yă Ndiõxí dàtná ní nduu táhú ndi-áⁿ ndécú váha ndii núú-gă, te ducaⁿ chi mee-gă ducaⁿ nĩ cachí-gă cunduu.

4

¹ Te nchòhó xìní-ndó sã ìⁿ té lĩhli chi vátá năgá cuañaha tătă-dě cuu cuèndá-dé chi lĩhli-dé, te ìⁿ-ni cùu-dé ndihi téé xĩnu cuechi, dico na sáá nduu cuèhnu-dé, te nduu táhú-dě nchaa sá ndécú ndihi

tátá-dě. ² Te xító-yu té lihli-áⁿ sáhnú-dě ndée sáá nduu nĩ cachí tátá-dě sá cuñaha-dě sá ndúú táhú-dě. ³ Te ducaⁿ sátnahá-xi cùu nchoo, chi nchícúⁿ nihnu-o nchàa nacuáa ní cáháⁿ cue téé ní xíndecu ndée sanaha ní cùu. ⁴ Te ní sáá nduu nĩ quide Yá Ndióxi dàtná ní cachí-gá, te ní tendaha-gá Déhe-gá Xítoho Jesucristú ní quixi-gá ñuyíú-a, ní dácácú ñàha ìⁿ ñadihí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ nĩ tendaha Yá Ndióxi Déhe-gá cuèndá sá vǎ cǎnchícúⁿ nihnu-gá-ó nchàa nacuáa ní chídó tnùní ndíi Moisés cuèndá ducaⁿ te cuu-o dēhe Yá Ndióxi.

⁶ Te Yá Ndióxi ní taxi-gá Espíritú Déhe-gá Xítoho Jesucristú ndécú ndíhi-ndo chi cùu-ndo déhe-gá, te Espíritú-áⁿ chíndèe ñaha-xi xii-ndo te cǎchí-ndó: “Yòhó Dútú Ndióxi cúú-n Tǎtá méé-ndí”, duha cǎchí-ndó. ⁷ Te xiǎⁿ cútnùní iní-ndó sǎ cúú-ndó dēhe Yá Ndióxi vitna, te ñá túú-gǎ cúú-ndó dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo déhe-gá, te Xítoho Jesucristú taxi-gá nchaa sá vǎha ní cachí Yá Ndióxi nduu táhú-ndó.

Té Pǎblú ío sàni iní-dé cuèndá nchaa ñáyiú ndècu ichi Xítoho Jesucristú

⁸ Te cútnàhá vátá quíndáá-gǎ iní-ndó tnũhu Yá Ndióxi ní xinu cuechi-ndo nũú nchàa sá cǎchí-yu cùu ndiόxí te ñá ndáá sá ndiόxí cúú-xí. ⁹ Te vitna nchòhó cǎháⁿ ndíhi-ndo Yá Ndióxi, te mee-gǎ xíní ñáhá-gǎ xii-ndo, te ñá túú ndùu váha-xi nanchòcáva iní-ndó càda tucu-ndo nacuáa ní xóo cada-ndo dǐhna, chi nchaa xiǎⁿ ñá túú vǎdana nàndíhi-xi. ¹⁰ Te nchòhó cǎnehe íí-ni-ndo ndùu cǎchí-ndó íí, te dǐu-ni ducaⁿ quide-ndo dava yoó

ndihi dava cuiá, te ndi tnahá nduu sácóo vico diu-ni ducaⁿ quide-ndo cánehe íí-ndó ndùu-áⁿ. ¹¹ Te ío sàni iní-í cuèndá-ndó, chi na cuáháⁿ àúⁿ nă cuu ní dánèhé ñáhà-í xii-ndo tnũhu Yá Ndiõxí.

¹² Te càháⁿ ndàhú-í núú nchòhó ñáyiú ndècu ndihi-í ichi Xítóhó Jesucrìstú sá cádá-ndó dàtná quide-í ñá túú nchìcúⁿ nihnu-í nchaa tnũhu ní cáháⁿ ndíi Moisés, chi yúhú quide-í vitna dàtná ní quide nchòhó ñá túú ní cānchicúⁿ nihnu-ndo nàcuáa ní cáháⁿ ndíi. Te cútnàhá ní xindecu ndihi ñaha-í xii-ndo nĩ quide váha ñaha-ndo xii-í. ¹³ Te sa ñaha-ndo sá cútnàhá ní cáháⁿ-í tnũhu Xítóhó Jesucrìstú núú-ndó ndèé díhna ní cuhú-í, núú xiáⁿ ní xindecu ndihi ñaha-í xii-ndo nĩ cáháⁿ-í tnũhu-gá núú-ndó. ¹⁴ Te cuéhé sã nĩ tnahá-í-áⁿ cúú-xí ñⁿ cuéhé sã vã yóo tnàhí cundee iní-xi cundecu ndihi ñaha xii-í ní cùu, dico nchòhó chi ío váha ní cáháⁿ ndihi ñaha-ndo xii-í, te ñá túú ní sàni cuehé ní sàni duha iní-ndó cuèndá-í, te ní cáháⁿ ndihi ñaha-ndo xii-í dàtná tnũhu sá yũhú cúú-í ñⁿ espíritú xínú cuèchi núú Yá Ndiõxí àdi datná méé Xítóhó Jesucrìstú. ¹⁵ ¿Te ná ní tnahá-ndó nũu ñá túú-gã sání vãha iní-ndó cuèndá-í dàtná ní xóo cada-ndo ndèé díhna ío váha ní xóo caní iní-ndó cuèndá-í? Te na càchí tnũhu ndáá-í xii-ndo sã ño ní cuu iní ñáhá-ndó xii-í cútnàhá ní xindecu ndihi ñaha-í xii-ndo, te nándi sá ndécú ndihi-ndo taxi-ndo xii-í ní cùu, te núú dicó sá cúú te ndèé tinũu-ndo tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuèndá sã càháⁿ-í tnũhu ndáá tnũhu Yá Ndiõxí núú-ndó-ãⁿ?

¹⁷ Te ío ñáyiú ío váha càháⁿ ndihi ñaha xii-ndo, dico ñáyiú-áⁿ ñũhú cuéhé iní-yu, chi cuíní-yu sá vã cúú-gã cáháⁿ ndihi tnàha-o, chi mee-nă-yu cun-

decu ndihi-ndo cuení-yu. ¹⁸ Te váha quíde ñáyiú cáháⁿ ndihi ñaha xii-ndo ndihi tnúhu yiñúhu, te núu cuení-yu cadá-yu ñⁿ sá vâha sá cúú-xí-ndó. Te ducaⁿ-ni na cadá-yu cuéi òré ñá túú ndècu ndihi ñaha-í xii-ndo. ¹⁹ Te nchòhó ñáyiú ní sanu ichi-í ichi Xítohó Jesucristú cächí tnúhu-í xii-ndo sã quidé-xí iní-í dàtná quidé-xí iní ñⁿ ñadihi ñaha sa ní tnahá òré cacu déhe-xi, te ducaⁿ quíde-xi iní-í, chi ío vâi sani iní-í cuendá-ndó dàtná ní xóo cada-í ndéé díhna, te ducaⁿ-ni cada-í ndéé ná sàá nduu cada-ndo nchaa nacuáa cáháⁿ Xítohó Jesucristú. ²⁰ Te ío váha cada-xi te núu dìcò tnavíi sa ndècu ndihi ñaha-í xii-ndo cuendá cáháⁿ-í núú-ndó nàcuáa cada-ndo, te ñá cútnúni iní-í nása cada-í cuendá-ndó!

Cuendá ndíi Àgár ndihi ndíi Sără

²¹ Te nchòhó ñáyiú cuení canchicúⁿ nihnu nchaa tnúhu ní cáháⁿ ndíi Moisés, ñáa ñá túú tècú tnúni-ndó nàcuáa cáháⁿ-xi tnúhu ní chídó tnúni ndíi? ²² Chi cächí tnúhu ní chídó tnúni ndíi-áⁿ sã ndíi Àbrahám ní xindecu úú déhe ducuⁿ ndíi, te ñⁿ-dé ní cuu déhe ndíi ndihi ñadihi méé ndíi ndíi Sără, te ingá-dé ní cuu-dé déhe ndíi ndihi ñⁿ ndíi ní xinu cuechi nũ-yu ní xínani Àgár. ²³ Te sá dúcáⁿ ñí cacu déhe ndíi Sără, chi mee Yã Ndiõxí ní cundàhú iní ñáhá-gã xii-aⁿ, chi ducaⁿ ñí cachí-gá cada-gá. Dico ndíi ní xinu cuechi-ãⁿ chi ducaⁿ tnàhí ní nduu táhú ndíi-áⁿ sã cóo dèhe ndíi. ²⁴ Te na cächí tnúhu-í xii-ndo ná cúú sã nánèhé ndíi ndúú cue ndíi dìhí-áⁿ. Te úú xito ní cáháⁿ Yã Ndiõxí nàcuáa cada-gá, te ñⁿ ndíi-áⁿ nánèhé ndíi nàcuáa ní cáháⁿ Yã Ndiõxí xito díhna nuu, te ingá tucu ndíi-áⁿ nánèhé ndíi nàcuáa ní cáháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa

ní xáhaⁿ Yă Ndiöxí xii ndíi Moisés yucu Sinái cada ñáyiú, te nchaa ñáyiú nchícúⁿ nihnu nchaa tnúhu-án cúŭ-yu dàtná déhe ndíi Àgár téé ní xinu cuechi, chi téé-án ñà túú tnàhí ni dàñá-dé quee-dé núú chíúⁿ pàtróóⁿ-dě, te ducaⁿ sãtnahá-xi cùú-yu chi nchícúⁿ nihnú-yu nchaa nàcuáa ní xáhaⁿ Yă Ndiöxí xii ndíi Moisés. ²⁵ Te tnúhu Àgár quéé-xi: Yucu Sinái, te yucu-án yíndèhu-xi nacióⁿ Àrabiá. Te ndíi Àgár-án nánèhé tucu ndíi cue ñáyiú ndècu ñuú Jerusàlén, chi ñáyiú-án ndécú-nĩ-yu dàtná ní xíndecu ndíi Àgár ndíhi déhe ndíi, chi cue ndíi-án nĩ cuu cue ndíi ñáyiú ñá túú tnàhí ni dàñá quee núú chíúⁿ pàtróóⁿ-xi, te ducaⁿ sãtnahá-xi cùú ñáyiú-án chi nchícúⁿ nihnu-nĩ-yu nchaa nàcuáa ní cáháⁿ ndíi Moisés. ²⁶ Dico nchoo nĩ nduu táhú-ó cùndecu-o ñuú Jerusàlén sáa núú ndécú Yă Ndiöxí, te vitna chi ñá túú-gă nchícúⁿ nihnu-o nchaa nàcuáa ní cáháⁿ ndíi Moisés. ²⁷ Te duha càháⁿ-í, chi núú tùtú Yă Ndiöxí cächí-xi:

Yòhó ñaha ní nduu táhú vă cóó dèhe-xi ni cùu, vitna
cana saa-n sã cúdíí ìní-n cuèi vátá quíní-gá-n
năsa càcu ìⁿ landú.

Te cuèi ní cuu táhú-n sã vă cóó dèhe-n ni cùu dico
ío-gá titní déhe-n còo dacúxí xíchí nĩ cuu
táhú tnàhí sá cóó dèhe-xi.

Duha cächí-xi núú tùtú-gá. ²⁸ Te nchoo cuè ñáyiú ndècu ichi Xítohó Jesucrístú vitna cùu-o datná ndíi Isàác, chi ndíi-án nĩ cacu ndíi, chi mee Yă Ndiöxí ní cachí-gá sá cacú ndíi. Te ducaⁿ sãtnahá-xi cùu nchoo chi ní nduu-o dèhe-gá vitna chi ducaⁿ nĩ cachí tucu-gá cunduu. ²⁹ Te déhe ndíi Àgár ní nduu táhú tnàhí ndíi sá cacú ndíi ñuyíú-a, te ndíi-án

nĩ cuu úhú iní ndíi ndíi Isàác, te ndíi Isàác-án chi Espíritú Yă Ndiõxí ní quide ní cacu ndíi. Te ducaⁿ sãtnahá-xi cùu vitna, chi nchaa nchoo ñăyiu ndècu ndihĩ Espíritú Yă Ndiõxí cúú úhú iní ñáhá ñăyiu xii-o. ³⁰ Te núú tùtú Yă Ndiõxí cächí-xi: “Chí năcuĩcúⁿ xíchí xínú cuèchi ndihĩ déhe-xi na nùhú-yu, chi déhe xíchí xínú cuèchi-án ñà túú nă níhí-dě nduu táhú-dě, chi mee-ni dēhe ñaha ndècu vehe-xi nduu táhú-dě sá cuăñaha tătá-dě”, duha cächí-xi núú tùtú-gá. ³¹ Te nchoo cuè ñăyiu ndècu ichi Xítóhó Jesucristú ñà túú-gă cúú-ó dàtná cúú dēhe ndíi ní xinu cuechi-ăⁿ, chi ní cuu-o vitna datná cúú ndíi ní nduu táhú nchaa sá nĩ sãñaha tătá-xi-án. Te ducaⁿ nĩ cuu, chi Yă Ndiõxí ní dăcăcu ñaha-gă xii-o cuëndá sá vă cánchezicúⁿ nihnu-gă-ó nchàa năcuáa ní cáháⁿ ndíi Moisés.

5

Canchicúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá năcuáa vă cání iní-ó sã nánihí tàhú-ó te núu na cánchezicúⁿ nihnu-o năcuáa ní cáháⁿ ndíi Moisés, te diu-ni ducaⁿ càní iní-ó cùndecu-o te vă ngõo càní iní-ó sã nánihí tàhú-ó te núu na cánchezicúⁿ nihnu-o càda-o năcuáa ní cáháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cùtnàhá vátá cùndecu-gă-ó ichi-a.

² Te yúhú té Păblú cuiní-í sá cùndedóho-ndo ñⁿ tnúhu na càháⁿ-í-a. Te núu nchòhó cuáha-ndo sēñá ñⁿ-ndo cuëndá sá sândáá iní-ndó năcuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nă cuu ndècu-ndo ichi Xítóhó Jesucristú te núu ducaⁿ. ³ Te dàtná ní cachí-í xii-ndo, te diu-ni ducaⁿ càháⁿ tucu-í vitna sá núu nděda-ni càa ñⁿ tée

na cuǎha-dé sèñá ñii-dé, te xini ñuhu-xi sá dàcuítí tǎu-dé cada-dé nchaa nǎcuáa ní cáháⁿ ndíi Moisés.
⁴ Te nchaa nchòhó ñáyiú sàni iní sá ñà túú-gǎ cuéchi-xi ndècu núú Yǎ Ndiǒxí cuèndá sá nchìcúⁿ nihnu-ndo nchàa nǎcuáa ní cáháⁿ ndíi Moisés, ñà túú-gǎ ndécú-ndó ndìhi Xítóhó Jesucrìstú, te ni Yǎ Ndiǒxí ñà túú-gǎ cùndàhú iní ñàhá-gǎ xii-ndo càda váha ñaha-gǎ. ⁵ Dico nchaa nchoo ñáyiú sàndáá iní ñàhá xii-gǎ cùdìu-o núú-gǎ, chi chìndee ñaha Espiritú-gǎ xii-o, te ndètu cahnu-ná-ó sàá nduu cùñaha núú Yǎ Ndiǒxí xii-o sǎ cùdìu-o núú-gǎ. ⁶ Te nchoo cuè ñáyiú ndècu ndìhi Xítóhó Jesucrìstú ñi-ni quide-xi cuèi na cuǎha-o sèñá ñii-o àdi vá cuǎha-o, chi ñà túú chìndee ñaha-xi xii-o nǎcuáa cundecu váha-o ndìhi-gǎ. Te ñiⁿdìi díi-ni sá xíní ñuhu-xi quindáá iní-ó Xítóhó Jesucrìstú, te núu ducaⁿ na càda-o te cuu iní-ó cuè tnaha ñáyiú-o.

⁷ Te nchòhó ío váha quide-ndo ndecu-ndo ichi Yǎ Ndiǒxí ní cùu, te vitna cùñúhu-í sá ñà túú-gǎ sàndáá váha iní-ndó tnúhu-gǎ, te ducaⁿ quide-ndo chi ndècu ñáyiú sànu ichi ñaha xii-ndo ingá ichi.
⁸ Te ñà díú Yǎ Ndiǒxí Yáá ní cáháⁿ ñàhá xii-ndo ducaⁿ ni cachí-gǎ cada-ndo sǎ vǎ quindáá-gǎ iní-ndó tnúhu-gǎ. ⁹ Te nchòhó xíní-ndó sǎ núu luha levadùrá ná quǐhu yuchi te dàndaa-xi. Ducaⁿ sǎtnahá-xi cùu ñáyiú dándahú ñàhá xii-ndo, chi cuíní-yu dàcuíta nihnu ñàhá-yu xii-ndo nchàa-ndo.
¹⁰ Te yúhú cútnùní ndáá iní-í sá Xítóhó Jesucrìstú chìndee ñaha-gǎ xii-ndo cuèndá sá ñà túú nǎgǎ tnúhu quindáá iní-ndó, dico nchaa ñáyiú ducaⁿ dándahú ñàhá xii-ndo nacháhu-yu núú Yǎ Ndiǒxí nchaa sá quidè-yu cuèi náí-gǎ ñáyiú cùú-yu.

¹¹ Te càchí tnúhu-í xii nchòhó ñáyi ndècu ndìhì-í ichi Yá Ndiõxí sá nũu dìcò dānehé-ni-í ñáyi sá cuǎha-yu sēñá ñi-yu dàtná ní cachí ndíi Moisés ñá, te vá yõ cuu úhú iní ñáhá xii-í ní cùu, te ni vǎ túu úhú iní-yu cuendá sá ñi xihí Xítohó Jesucristú núu cùrúxí ní cùu. ¹² Te nchaa ñáyi dàsatú iní ñáhá xii-ndo sǎ cuǎha-ndo sēñá ñi-ndo, te váha-gá sá ná cáda-yu mēe-yu ñi tnúndòho, te ñá díú sǎ dúcáⁿ cànuichi ñáhá-yu xii-ndo cùndecu-ndo.

¹³ Te nchòhó ñáyi ndècu ndìhì-í ichi Xítohó Jesucristú diu-gá ní taunihnu ñaha-gǎ xii-ndo cuendá sá vǎ cáncìcúⁿ nihnu-gá-ndó nchàa nacuaá ní cáháⁿ ndíi Moisés, dico vá cání ìní-ndó sǎ sǎ dúcáⁿ ñi taunihnu ñaha-gǎ xii-ndo, te cuu-ni cada-ndo nǎndi sá cuèhé sá dúhá vǐxi iní-ndó, dico cuu iní tnáhá-ndó ñi ñi-ndo te chindee tnàha-ndo. ¹⁴ Chi ducaⁿ cáháⁿ Yá Ndiõxí sá cúú ìní-ó cuè tnàha ñáyi dàtná cúú ìní-ó mēe-o. Te núu ducaⁿ na càda-o, te quide-o nchaa nacuaá tàú-xi cada-o dàtná cáháⁿ nchaa tnúhu ní chídó tnùní ndíi Moisés. ¹⁵ Te núu nchòhó cúú úhú iní tnáhá-ndó ndècu-ndo, te ñá túú quide váha-ndo te núu ducaⁿ quide-ndo, dico yúhú càchí-í sá vǎ dúcáⁿ-gǎ cada-ndo cùndecu-ndo cuendá sá vǎ dácuita nihnu tnàha-ndo.

Nàcuáa sàni iní ñáyi ndècu ichi cuehé ichi duha ndìhì nàcuáa sàni iní ñáyi ndècu ndìhì Espiritú Yá Ndiõxí

¹⁶ Te na càchí tnúhu-í xii-ndo sǎ cáda-ndó nchàa nacuaá cuìní mēé Espiritú Yá Ndiõxí cada-ndo, te ducaⁿ te vá cání-gǎ ìní-ndó càda-ndo nǎndi nchaa sá cuèhé sá dúhá sàni iní mēé-ndó. ¹⁷ Chi nchaa xíáⁿ ñá túú tnáhá tnúhu-xi ndìhì Espiritú Yá Ndiõxí. Te diu-ni ducaⁿ quide Espiritú Yá Ndiõxí, chi ñá túú

tnàhá iní-xi nchaa sá cuèhé sá dúhá sàni iní-ndó. Te sá dúcáⁿ ñà túú tnàhá tnúhu tnàha-xi xiǎⁿ ñà túú nihi ndéé-ndó càda-ndo ìⁿ sá vâha sàni iní-ndó càda-ndo. ¹⁸ Te núu quide-ndo nchaa nacuáa sànu ichi ñaha Espíritú Yă Ndiǒxí, te ñà túú-gă táxí tnùní ñáhá nchàa tnúhu ní chídó tnùní ndíi Moisés xii-ndo.

¹⁹ Te nchaa ñáyiu xìní-yu nchaa nàcuáa quide ñáyiu quide cuehé quidé dùha. Te duha quidé-yu: Cue téè càháⁿ ndihi-güedé ñáyiu dihi te ñà díú ñàdihi-güedé cúu-yu, te diu-ni ducaⁿ xiquide cue ñáyiu dihi, te nándi-gá nchaa sá cuèhé sá dúhá cuáháⁿ véxi-yu quidé-yu. ²⁰ Te quide cahnú-yu nchaa sá càchí-yu cùu ndiǒxí te ñà ndàá sá ndiǒxí cúú-xí, te quide nduu tnahá-yu, te cùu úhú iní tnáhă-yu, te nàa-yu, te cùu cuiñú tnáhă-yu, te ío yáchí cúdeěⁿ-yu, te ndúcú-yu mee-ni sá cúú-xí mée-yu, te ñà túú cùu ìⁿnuú-yu cundecú-yu, te quide diⁿ tnahá-yu. ²¹ Te cùu cuedú iní-yu nchaa sá ndécú ndihi dava-gá-yu, te sàhni tnahá-yu, te ío quihú-yu, te ndi cuu ndi cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa càchí tnúhu-í xii-ndo sà ncháá ñáyiu ducaⁿ xiquide vá ndúú tǎhŭ-yu cundecú-yu núú ndécú Yă Ndiǒxí táxí tnùní-gá.

²² Dico Espíritú Yă Ndiǒxí chindée ñaha-xi xii-o cuu iní tnáhá-ó, te cùdí iní-ó ndècu-o, te ío vâha cùu iní-ó, te càhnu iní-ó, te vâha iní-ó, te cùndahú iní tnáhá-ó, te quide ndàá-ó ndècu-o. ²³ Te ndàhú iní-ó, te quide-o nchaa nacuáa tàú-ó càda-o, te nchaa xiǎⁿ chindée ñaha Espíritú Yă Ndiǒxí quidé-ó, te núu ducaⁿ quide-o, te vá yǒo ìⁿ-gá cáháⁿ sá ñà túú quide vâha-o ndècu-o. ²⁴ Te nchoo cuè ñáyiu ndècu ndihi

Xítóhó Jesucrístú, sa nàha-o sá nǐ xíhí-gá núú cùrúxí sá cuendá-ó, núu xǎⁿ duuⁿ duuⁿ ní dáñá-ó nchàa ichi cuehé ichi duha, te ñá túú-gǎ táxí tnùnǐ ñáhá nǐ ìⁿ sá cuèhé sá dúhá sǎ nǐ xóo cani iní-ó ní cùu.
²⁵ Te vitna ní ngúndecu ndìhì-o Espíritú Yǎ Ndiǒxí chíndèe ñaha-xì, te xìni ñuhu-xì sá cádá-ó nàcuáa sànu ichi ñaha Espíritú-gá cada-o.

²⁶ Te vá cádá càhnu-o mee-o, te vá ndúcú-ó plètú, te ni vǎ cúú cuèdú iní-ó sǎ ndécú ndìhì tnaha ñáyiú-o.

6

Chindee tnàha-o ìⁿ ìⁿ-o

¹ Te nchòhó ñáyiú ndècu ndìhì-í ichi Xítóhó Jesucrístú càchí tnúhu-í xii-ndo sǎ núu ìⁿ ñáyiú ndècu ndìhì-ndo ichi-gá ní quidé-yu ìⁿ sá ñà túú tàú-yu cadá-yu núú-gǎ, te nchòhó ñáyiú quide váha ndècu ndìhì Espíritú Yǎ Ndiǒxí cáháⁿ-ndó dǒho cue ñáyiú ducaⁿ xǐquide-áⁿ cuendá nucúnu ichí-yu, te vii vii cáháⁿ ndìhì-ndǒ-yu, te ío coto-ndo mée-ndo cuendá sá vǎ cádá-ndó ìⁿ sá ñà túú tàú-ndó càda-ndo núú-gǎ. ² Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yǎha-ndo. Te núu ducaⁿ na càda-ndo, te quide-ndo nchaa nacuáa ní cáháⁿ Xítóhó Jesucrístú cada-o.

³ Te núu ío ìⁿ-ndo càchí-ndó sǎ ìo váha quide-ndo ndecu-ndo ichi Yǎ Ndiǒxí te ñá ndàá ñǎ, te dǐcǒ dándàhú-ndó mée-ndo sá dúcǎⁿ quide-ndo. ⁴ Te ndì dǐíⁿ ndì dǐíⁿ càda cuendá-ndó núu quide váha-ndo ndècu-ndo àdì ñá túú quide váha-ndo. Te núu quide váha-ndo ndècu-ndo ña, te cudǐí ìní-ndó sǎ cúú-xí mée-ndo, te vá cání ìní-ndó sǎ quidé vǎha-gá-ndó

dàcúúxí dàva-gá-yu. ⁵ Chi tàú-ó sǎ ndì dííⁿ ndì dííⁿ càda cuendá-ó nàcuáa ndècu-o.

⁶ Te nchaa nchòhó ñáyiù dàcuaha tnúhu Yá Ndiǒxí chindee-ndo cuè téé dàcuaha ñaha xii-ndo tnúhu-gá cuáñaha-ndo nǎndi sá xíní ñùhu-güedé.

⁷ Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yǎ Ndiǒxí, chi nchòhó xíní-ndó sǎ núu na càda váha-o cundecu-o, te cùu-xi ñⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. ⁸ Te núu quide-o nchaa sá cuèhé sá dúhá sàni iní-ó, te diu-ni xǎⁿ dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yá Ndiǒxí xii-o, te cundecu ndìhi-o Yá Ndiǒxí ni caa ni quíhíⁿ. ⁹ Te xini ñuhu-xi vá dáñá ndèé-ó càda váha-o cundecu-o, te ducaⁿ te sáá nduu càda váha ñaha Yá Ndiǒxí xii-o, te núu vá ná tǔhú iní-ó càda váha-o cundecu-o. ¹⁰ Te cada-o sǎ váha sá cúú-xí nchaa tnaha ñáyiù-o vìtna ndecu-o ñuyíú-a, te ío-gá tàú-ó chindee-o cue ñáyiù ndècu ndìhi-o ichi Xítóhó Jesucrístú.

Tnúhu ndéé núú nǐ ndìhi-ná

¹¹ Te cundehe-ndo sǎ ndǎa ndǎa lètrá téè-í núú tütú-a sá cúú-xí-ndó. ¹² Te nchaa ñáyiù quide yicá sá cuǎha-ndo sèñá ñii-ndo dàtná ní cachí ndíi Moisés, ñáyiù-áⁿ cúú-yu ñáyiù cuíní cudíu núú tnàha ñáyiù-xi. Te ducaⁿ quidé-yu cuendá sá vǎ ndóhǒ-yu cuendá nchaa tnúhu sá dánèhé ñáhá sǎ nǐ xíhí Xítóhó Jesucrístú núú cùrúxí. ¹³ Te ni ñáyiù sa ní ngúndecu ndìhi sèñá ñii-xi ñá túú quidé-yu nchaa nàcuáa ní cáháⁿ ndíi Moisés, dico mèe-yu cuíní-yu sá cuǎha-ndo sèñá ñii-ndo. Te ducaⁿ quidé-yu chi quide cahnú-yu mèe-yu núú nchàa dàva-gá ñáyiù. ¹⁴ Te yúhú chi ñá túú quide

cahnu-í méè-í cuendá nchaa sá quidè-í, chi mee-ni sá ïo cùu váha iní-í sá Xítóhó Jesucrìstú ní xíhí-gá núú cùrúxí cuendá-ó. Te diu cuendá sá ní xíhí-gá ñá túú-gă ndécù-í ichi cuèhé ichi duha, te ní ñà túú-gă táxí tnùní ñáhá nì ìⁿ sá cuèhé sá dúhá xì-í. ¹⁵ Te ñá túú nă chíndèe ñaha-xi xii-o cuéi na cuăha-o sěñá ñi-í-ó àdi vá cuăha-o, chi ndècu ndi-í-ó Xítóhó Jesucrìstú, te ní nduu-o dàtná ìⁿ ñáyiú saa, te xíⁿ cúú-xí sá ïo-gá xíní ñùhu-xi. ¹⁶ Te xìcáⁿ táhù-í núú Yă Ndiôxí sá ncháá nchòhó ñáyiú quide nchaa nacuaá càháⁿ-í-a cundecu nahi-ndo, nchòhó ñáyiú cùu cuendá Yă Ndiôxí dàtná ñáyiú isràél chi ñáyiú-áⁿ ní cachí-gá sá cúú cuendá-gá. Te mee-gă ïo cundàhú iní ñáhá-gă xii-ndo chìndee ñaha-gá.

¹⁷ Te není vitna cuèní-í sá vă yôo ìⁿ-gá chidácá nihnu ñaha xì-í cuendá chiùⁿ quide-í, chi yayàcáⁿ sa ní nduu tìlòhó ñi-í-í cuendá sá ndóhò-í cuendá Xítóhó Jesucrìstú.

¹⁸ Te nchòhó ñáyiú ndècu ndi-í-í ichi Xítóhó Jesucrìstú xìcáⁿ táhù-í núú-gă sá ïo na chìndee ñaha-gá xii-ndo ncháa-ndo. Te ducaⁿ na cùnduu. Te ïo chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939